



Broj: 01/3-50-1-3-15/07
Sarajevo, 13. 12. 2007. godine

Z A P I S N I K
15. sjednice Komisije za vanjsku trgovinu i carine
Predstavničkog doma Parlamentarne skupštine BiH,
održane 13.12. 2007. godine

Sjednica je počela u 9 sati.

Sjednicom je predsjedavala predsjedavajuća Komisije Snježana Rajilić.

Sjednici su prisustvovali članovi Komisije: Mehmed Suljkanović, Slavko Jovičić, Šemsudin Mehmedović, Salko Sokolović, Jerko Ivanković Lijanović i Jozo Križanović.

Opravnado su odsustvovali: Hadži Jovan Mitrović i Ekrem Ajanović.

Sjednici su, također, prisustvovali: Dušan Nešković, pomoćnik ministra vanjske trgovine i ekonomskih odnosa BiH, Seid Uzunović, šef Odsjeka u Ministarstvu vanjske trgovine i ekonomskih odnosa BiH, i Emira Češljarić, sekretar Komisije.

Za sjednicu Komisije predložen je i jednoglasno usvojen sljedeći

D N E V N I R E D

1. Razmatranje Prijedloga zakona o vinu, rakiji i drugim proizvodima od grožđa i vina radi dostavljanja izvještaja Predstavničkom domu, u skladu s članom 118. stav (3) Poslovnika Predstavničkog doma, predlažać: Vijeće ministara BiH s amandmanima Slavka Jovičića;
2. Tekuća pitanja:
 - a) određivanje članova Komisije radi prisustva sjednici UOUIOBiH, koja će se održati 14.12.2007. u Mostaru.

Ad.1.

Na početku rasprave predsjedavajuća Komisije Snježana Rajilić upoznala je prisutne da je Predstavnički dom na 18. sjednici, održanoj 12.12.2007., razmatrajući navedeni zakon u drugom čitanju, u pauzi nakon rasprave održao Prošireni kolegij kojem je prisustvovao i predstavnik predlažaća Zakona. Kolegij Doma odlučio je da ne zaključi raspravu o Zakonu i da na osnovu člana 118. stav (3) Poslovnika Predstavničkog doma predloži Komisiji da ponovo s predlažaćem Zakona pokuša usaglasiti amandmane i podnese novi izvještaj Domu.

U raspravi su učestvovali: Slavko Jovičić, Mehmed Suljkanović, Salko Sokolović, Snježana Rajilić i Jerko Ivanković Lijanović.

Dušan Nešković je, u ime predlažaća Zakona, rekao da za predlažaća nije prihvatljiv amandman VIII. koji je Komisija usvojila na 12. sjednici, a nisu prihvatljivi ni amandmani V., XIII i XVIII. Predlažać amandmana Slavko Jovičić rekao je da bi odustao od navedenih amandmana ako oni konceptualno mijenjaju odredbe Zakona. Predlažać Zakona istakao je da je suština da BiH dobiva zakonsku regulativu na nivou države, usklađen s direktivama EU; da je suština da MVTEO

BiH na nivou države prikuplja kompletne podatke u saradnji s entitetskom institucijama i Brčko Distriktom i dokumentira ih nadležnim institucijama; te smatra da bi se oko 15 amandmana moglo prihvatiti i ugraditi u novi izvještaj Komisije.

Mehmeda Suljkanovića interesiralo je da li u Prijedlogu zakona postoji visok stepen prijenosa nadležnosti zbog čega je uloženo 27 amandmana i mišljenja je da je onda najbolje da se usvoji Zakon bez amandmana.

Većina učesnika u raspravi nije bila saglasna, jer nije postignut kompromis da se ponovo sačini izvještaj i razmotre amandmani, a nije bilo drugih prijedloga za dodatne amandmane.

Nakon ponovnog ukazivanja na obaveze Komisije prema Domu za dostavljanje novog izvještaja o Zakonu, **Komisije je sa 5 glasova „za“ i jednim „uzdržanim“ glasom, zaključila** da predlagač zakona u pisanoj formi dostavi izjašnjenje o amandmanima i obrazloži razloge za sve amandmane koje može prihvatiti, a koje ne.

Prihvaćen je prijedlog da sekretar, zajedno s predlagačem Zakona u pismenoj formi ponovo obradi amandmane Slavka Jovičića s prethodno usvojenim i spornim amandmanima i dostavi pismeno izjašnjenje, da bi Komisija nastavila raditi i sačinila izvještaj Domu.

Ad.2.

Tekuća pitanja:

- a) određivanje članova Komisije radi prisustva sjednici UOUIOBiH, koja će se održati 14.12.2007. u Mostaru

Predsjedavajuća Komisije je na osnovu obavljenog razgovora s generalnim sekretarom Sekterarijata UOUIOBiH kojem je prisustvovao i Jerko Ivanković Lijanović predložila da sjednici UO koja će se održati 14.12.2007. u Mostaru, prisustvuju predsjedavajuća i dva zamjenika.

Na sjednici UO treba da se razmatra Prijedlog zakona o izmjenama Zakona o carinskoj tarifi BiH, predlagača Vijeća ministara BiH, koji je Komisija na osnovu zaključka 14. sjednice dostavila 14.11.2007. na razmatranje UO sa usvojenim i ugrađenim amandmanima.

Prvi zamjenik predsjedavajuće Mehmed Suljkanović rekao je da iz opravdanih razloga ne može prisustvovati sjednici. Predloženo je da Šemsudin Mehmedović prisustvuje sjednici UO, ali je odustao.

Komisija je zaključila da sjednici UOUIOBiH prisustvuju Snježana Rajilić i Jerko Ivanković Lijanović.

Predsjedavajuća Komisije zadužila je sekretara Komisije da se angažira za dobivanje poziva od UO za sjednicu i putnog naloga.

Jerko Ivanković Lijanović predložio je da Komisija u vezi s razmatranjem Prijedloga zakona o izmjenama Zakona o carinskoj tarifi BiH dostavi zaključke o analizi efekata koji će nestati primjenom navedenog zakona. Smatra da ovi zaključci treba da budu dostavljeni UOUIOBiH.

Sjednica je prekinuta u 10 sati.

NASTAVAK 15. SJEDNICE, održan 28. 12. 2007. godine

Sjednica je počela u 9 sati.

Sjednicom je predsjedavala predsjedavajuća Komisije Snježana Rajilić.

Sjednici su prisustvovali članovi Komisije: Mehmed Suljkanović, Slavko Jovičić, Šemsudin Mehmedović, Salko Sokolović, i Hadži Jovan Mitrović.

Opravdano su odsustvovali: Jerko Ivanković Lijanović, Ekrem Ajanović i Jozo Križanović. Sjednici su, također, prisustvovali: Dušan Nešković, pomoćnik ministra vanjske trgovine i ekonomskih odnosa BiH, Seid Uzunović i Rasim Šećerović, šefovi odsjeka u Ministarstvu vanjske trgovine i ekonomskih odnosa BiH, i Emira Češljarić, sekretar Komisije.

Za nastavak sjednice predložen je i jednoglasno usvojen sljedeći

D N E V N I R E D

1. Ponovno razmatranje Prijedloga zakona o vinu, rakiji i i drugim proizvodima od grožđa i vina sa izjašnjenjem Ministarstva vanjske trgovine i ekonomskih odnosa BiH o predloženim amandmanima Slavka Jovičića, radi dostavljanja izvještaja Predstavničkom domu, u skladu s članom 118. stav (3) Poslovnika Predstavničkog doma;
2. Tekuća pitanja:
 - a) obavještenje UOUIO BiH o razmatranju Prijedloga zakona o izmjenama Zakona o carinskoj tarifi BiH, dostavljeno Komisiji 25.12.2007;
 - b) dodatno objašnjenje MVTEO o razmatranju Prijedloga zakona o izmjenama Zakona o carinskoj tarifi BiH dostavljeno predsjedavajućem Predstavničkog doma 18.12.2007;
 - c) obavještenje Komisije Kolegiju Doma o statusu Prijedloga zakona o izmjenama Zakona o carinskoj tarifi BiH, predlagača: Komisije za vanjsku trgovinu i carine i Vijeća ministara BiH.

Ad.1.

Ponovno razmatranje Prijedloga zakona o vinu, rakiji i i drugim proizvodima od grožđa i vina sa izjašnjenjem Ministarstva vanjske trgovine i ekonomskih odnosa o predloženim amandmanima Slavka Jovičića radi dostavljanja izvještaja Predstavničkom domu, u skladu s članom 118. stav (3) Poslovnika Predstavničkog doma

Predsjedavajuća Komisije Snježana Rajilić upoznala je prisutne o načinu razmatranja amandmana, kako je dogovoreno 13. 12. 2007. Mišljenja je da se može diskutirati o amandmanu V. koji daje puno ovlaštenja institucijama, a ostali amandmani za koje je MVTEO dalo pozitivan stav mogli bi se prihvatiti.

Slavko Jovičić ponovo je rekao da će prilikom glasanja biti suzdržan jer smatra da nema saglasnosti nadležnog ministarstva entiteta na tekst Zakona. Predstavnik predlagača Zakona rekao je da je prije dostavljanja u parlamentarnu proceduru Prijedloga zakona dobivena saglasnost entiteta na predloženi tekst.

Nakon rasprave u kojoj su učestvovali Mehmed Suljkanović, Slavko Jovičić i Snježana Rajilić, Komisija je, sa pet glasova „za“ i jednim „uzdržanim“ usvojila sljedeće amandmane:

Amandman I.

„U članu 8. stav (2) iza riječi „Ministarstvo“ dodaju se riječi: „u saradnji s nadležnim organima“

Amandman II.

U članu 8. stav (3) se briše.

Amandman III.

U članu 11. stav (1) riječ „podsticajne“ zamjenjuje se riječju „razvojne“.

Amandman IV.

U članu 11. stav (1) riječi: „obavlja institucija ovlaštena“ zamjenjuje se riječima: „obavljaju institucije ovlaštene“.

Amandman V.

U članu 14. stav (6) riječi: „ovlaštena institucija“ zamjenjuju se riječju „ministarstvo“.

Amandman VI.

U članu 50. stav (1) riječi: „ovlaštena institucija“ zamjenjuju se riječima: „ovlaštene institucije“.

Amandman VII.

U članu 67. stav (2) riječ „organizacija“ zamjenjuje se riječju „institucija“; riječi: „geografskog porijekla“ zamjenjuju se riječima: „geografsko porijeklo“.

Amandman VIII.

U članu 70. stav (1) tačka b) riječ „cijenama“ zamjenjuje se riječima: „naknadama troškova“

Amandman IX.

U članu 71. stav (1) mijenja se i glasi: „Službene kontrole i inspekcijski nadzor provode se u skladu s važećim zakonskim propisima“.

Amandman X.

U članu 71. stav (2) ispred riječi „nadzor“ dodaje se riječ „inspekcijski“.

Amandman XI.

Član 74. se briše.

Amandman XII.

Član 92. se briše.

Amandman XIII.

U članu 93. stav (1) tačke: a), b), c), d), f), g), h), j), k), l), m), o), i q) se brišu.

Na osnovu člana 111. stav (3) Poslovnika Predstavničkog doma, 13 usvojenih amandmana postaju sastavni dio Prijedloga zakona.

Komisija je, većinom glasova, prihvatila Prijedlog zakona sa usvojenim amandmanima, te će predložiti Predstavničkom domu usvajanje Zakona o vinu, rakiji i drugim proizvodima od grožđa i vina.

Tekuća pitanja:

- a) obavještenje UOUIOBiH o razmatranju Prijedloga zakona o izmjenama Zakona o carinskoj tarifi BiH, dostavljeno Komisiji 25.12.2007.,

Članovi Komisije primili su k znanju obavještenje UOUIOBiH o zaključcima usvojenim na 84. i UO, održanoj 14.12.2007., i konstatirali da je apsurdno da Komisija dostavi analizu očekivanih indirektnih efekata koji bi nastali carinskim oslobađanjima prema predloženim amandmanima. Podaci koji su dobiveni od UIOBiH na izmjene Zakona, čiji je predlagač Komisija odnose se za period 2006. godine. Analizu efekata treba ponovo uraditi za protekli period 2007, što je obaveza UIOBiH, što je potrebno sačekati.

- b) dodatno objašnjenje MVTEO o razmatranju Prijedloga zakona o izmjenama Zakona o carinskoj tarifi BiH, dostavljeno predsjedavajućem Predstavničkog doma 18.12.2007.

Sekretar Komisije je na molbu predsjedavajuće, u kratkim crtama upoznala prisutne o hronologiji rada na izmjenama Zakona o carinskoj tarifi BiH, predlagača Vijeća ministara BiH, uz napomenu da predložene izmjene carinskih stopa imaju odobrenje UO;

- c) obavještenje Komisije Kolegiju Doma o statusu Prijedloga zakona o izmjenama Zakona o carinskoj tarifi BiH, predlagača: Komisije za vanjsku trgovinu i carine i Vijeća ministara BiH

Sekretar Komisije upoznala je prisutne da je na sastanku Komisije, održanom 12.12.2007., dogovoreno da će Komisija nakon dobivanja odobrenja od UOUIO BiH tj. provođenja kompletne zakonske procedure o Prijedlogu zakona o izmjenama Zakona o carinskoj tarifi BiH podnijeti izvještaj Predstavničkom domu. Obavještenje o navedenom Komisija je dostavila Kolegiju Doma 18.12.2007.

U diskusiji su učestvovali: Šemsudin Mehmedović, Mehmed Suljkanović i Snježana Rajilić. Iz UO BiH molili su da se iz ugrađenih amandmana u Prijedlog zakona izdvoje amandmani koje je usvojila Komisija na 13. i 14. sjednici da bi se dobilo na vremenu u provođenju procedure u UIO BiH o čemu u Komisiji nije bilo saglasnosti.

Na sastanku s članovima UO u Mostaru 14.12. 2007., predsjedavajuća Komisije rekla je da se razgovaralo uopćeno o finansijskim efektima, ali da o prijedlogu izmjena Komisije nije bilo riječi.

Komisija je zaključila da se iz Prijedloga zakona ne izdvajaju usvojeni amandmani Komisije koji su ugrađeni u Zakon jer Komisija ne može biti sigurna koji će biti finansijski efekti s obzirom na protek vremena i različite finansijske pokazatelje koji utiču na smanjenje priliva sredstava u budžet BiH.

Sjednica je završena u 9,45 sati.

Sekretar Komisije
Emira Češljarić

Predsjedavajuća Komisije
Snježana Rajilić